


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-73	Al-Muzzammil	20	2	Makkiyyah	Ke-3	4



Zaman Diturunkan

1. 8 Ayat di permulaan Surah Al-Muzzammil mungkin sekali diturunkan selepas beberapa ayat di permulaan Surah al-'Alaq dan Surah al-Muddatstsir. Daripada segi tertib nuzuli, Surah Al-Muzzammil adalah surah yang ke-3, dan 8 ayat di permulaan Surah Al-Muzzammil itu mungkin sekali diturunkan pada tahun pertama Kenabian juga, tidak lama selepas turunnya wahyu-wahyu yang turun sebelumnya. Surah Al-Muzzammil mengandungi persiapan untuk melahirkan kepemimpinan yang unggul (السَّابِقُونَ الْأَوَّلُونَ) di masa akan datang. Oleh sebab da'wah pada ketika itu berjalan secara sulit dan sembahyang 5 waktu belum lagi ada, orang-orang Islam diminta membaca dan mendengar ayat-ayat yang telah diturunkan kepada mereka di dalam shalat tahajjud pada waktu tengah malam dalam bacaan penuh tartil.
2. 11 Ayat di tengah Surah Al-Muzzammil iaitu ayat 9 hingga 19 diturunkan setelah da'wah secara terbuka dilancarkan, pada ketika itu sudah ada pendustaan daripada pihak orang-orang kafir Mekah, bahkan Rasulullah s.a.w. dinasihati supaya bersabar atas tuduhan-tuduhan dan kritikan-kritikan pemimpin-pemimpin Quraisy yang sikap mereka diumpamakan seperti sikap Fir'aun.
3. Ayat-ayat terakhir surah ini iaitu ayat ke-20 mungkin sekali diturunkan di Madinah pada tahun 1 Hijrah sebaik sahaja berlaku hijrah ke sana.

Ciri-Ciri Khusus Surah Al-Muzzammil

Surah ini membentuk kerohanian, keimanan dan keilmuan para sahabat yang baru memeluk agama Islam supaya mereka berjaya pada masa-masa berikutnya dan bersabar dalam menghadapi sikap dan tindakan pemimpin-pemimpin Quraisy yang diumpamakan dengan sikap dan tindakan Fir'aun itu. Selama 12 tahun kehidupan di Mekah umat Islam hanya diarahkan bersembahyang tahajjud sahaja. Para sahabat terdiri daripada bangsa Arab yang cukup memahami bahasa al-Qur'an. Rasulullah s.a.w. bershalat tahajjud bersama-sama para sahabat yang betul-betul ikhlas di permulaan Islam itu. Mereka mendengar bacaan Baginda yang penuh dengan tartil di dalam shalat selama beberapa jam di waktu akhir malam atau tengah malam dalam keadaan mereka betul-betul terpisah daripada kesibukan dunia. Sembahyang 5 waktu baru difardhukan dalam peristiwa Mi'raj pada tahun ke-12 Kenabian, setelah itu hukum bertahajjud mulai diringankan, hal ini ada tersebut di akhir Surah Al-Muzzammil.

Kaedah Mendalami Al-Qur'an Dalam Shalat Tahajjud

'Abdullah bin 'Abbas ketika menjelaskan firman Allah وَأَقْرَأْ قِيلًا tentang shalat tahajjud di dalam Surah Al-Muzzammil berkata: “أَجْدَرُ أَنْ يَفْقَهُ فِي الْقُرْآنِ” Bermaksud: Bacaan al-Qur'an di dalam shalat tahajjud lebih sesuai dan elok untuk seseorang memperdalaminya tentang al-Qur'an”. Sunan Abi Daud, Kitab Shalat, hadits 1,109.

Al-Qur'an baru dapat disalami maksudnya apabila ia dibaca dengan penuh tartil, terang dan berhenti pada setiap ayatnya. Ummul mu'minin Ummu Salamah menjelaskan cara bacaan al-Qur'an oleh Rasulullah s.a.w. iaitu Baginda membacanya haraf demi haraf **حَرْفًا** **وَصَفَتْ قِرَاءَةَ النَّبِيِّ صَلَّى اللَّهُ عَلَيْهِ وَسَلَّمَ حَرْفًا** ertinya dengan terang dan berhenti di akhir setiap ayat. Sunan at-Tirmizi, Kitab Bacaan al-Qur'an, hadits 2,927.

Ummu Salamah berkata: "Rasulullah s.a.w. membaca setiap ayat secara berasingan dan berhenti di hujung setiap ayat, setelah membaca **الْحَمْدُ لِلَّهِ رَبِّ الْعَالَمِينَ** Baginda berhenti. Selepas itu, setelah membaca **الرَّحْمَنُ الرَّحِيمُ** Baginda berhenti pula dan seterusnya selepas membaca **مَلِكِ يَوْمِ الدِّينِ** Baginda berhenti lagi dan begitulah seterusnya". Sunan Abi Daud, Kitab Huruf dan Bacaan, hadits 3,487.

Pemahaman yang mendalam tentang al-Qur'an baru terhasil apabila al-Qur'an dibaca secara tartil. Tujuannya ialah untuk melayakkan orang-orang yang beriman dan ikhlas menjadi imam. Di zaman permulaan Islam, kelayakan untuk menjadi majlis syura negara Islam dilihat dari sudut kemampuan seseorang dan ilmunya tentang al-Qur'an tanpa mengambil kira umur. 'Abdullah bin 'Abbas berkata **كَانَ الْفَرَاءُ أَصْحَابَ مَجَالِسِ عُمَرَ وَمُشَاوَرَتِهِ كَهَوْلًا كَانُوا وَشُبَّانًا** Bermaksud: "Ahli-ahli majlis mesyuarat Sayyidina 'Umar terdiri daripada orang-orang yang alim tentang al-Qur'an, tidak kira sama ada mereka tua atau muda". Shahih Bukhari, Kitab Tafsir, hadits 4,642.

Perkaitan Surah Al-Muzzammil Dengan Surah Sebelum Dan Selepasnya

1. Di dalam Surah al-Jin sebelum ini telah pun dikemukakan secara terperinci tentang kedudukan dan jawatan kerasulan, para rasul menyampaikan utusan Allah kepada manusia dalam keadaan mereka tidak mempunyai kuasa untuk memberi manfaat atau mudharat, juga dalam keadaan mereka tidak mempunyai ilmu tentang perkara ghaib. Di dalam Surah Al-Muzzammil ini dikatakan bahawa perutusan Rasulullah s.a.w. kepada bangsa Quraisy Mekah tak ubah seperti perutusan Nabi Musa kepada Fir'aun (Ayat: ١٥).

إِنَّا أَرْسَلْنَا إِلَيْكُمْ رَسُولًا شَهِدًا عَلَيْهِ كَمَا أَرْسَلْنَا إِلَىٰ فِرْعَوْنَ رَسُولًا ﴿١٥﴾

Para rasul dan umat Islam ditugaskan membawa kesaksian kepada manusia sekaliannya.

2. Di dalam Surah al-Jin ada tersebut bahawa golongan jin telah mendengar al-Qur'an, mereka cukup terpengaruh dengannya, setelah mendengarnya mereka bukan sahaja memeluk agama Islam bahkan terus bergerak aktif menyebarkan 'aqidah tauhid dan agama Islam di kalangan mereka. Di dalam Surah Al-Muzzammil ini orang-orang Islam diarah supaya mendengar al-Qur'an yang dibaca dengan penuh tartil dan mereka diperintah supaya merenungi dan mendalami ajaran-ajarannya supaya mereka juga mampu menjadi penda'wah dan pembawa ajaran Islam.

3. Rasulullah s.a.w. diminta bersabar menghadapi suasana tuduhan dan kritikan oleh pihak musuh **وَأَصْبِرْ**

عَلَىٰ مَا يَقُولُونَ (Ayat: 10). Di dalam Surah al-Muddatstsir akan datang pula perintah bersabar dalam berda'wah kerana Allah semata-mata juga diberikan kepada Baginda untuk menghadapi suasana tuduhan dan kritikan oleh pihak musuh. وَلِرَبِّكَ فَاصْبِرْ (Al-Muddatstsir: 7).

Beberapa Kata Kunci Dan Tema Utama Surah

1. Maksud perintah al-Qur'an supaya membacanya dengan tartil ialah membacanya dengan perlahan dan berhenti di akhir setiap ayat وَرَتِّلِ الْقُرْآنَ تَرْتِيلًا (Ayat: 4). Disebutkan maf'ul mutlaq bagi رَتِّلِ untuk memberi penekanan yang lebih kepada cara bacaan seperti itu.

Al-Qur'anlah satu-satunya kitab di dunia ini yang menyuruh orang membacanya secara tartil dan tidak membacanya secara sambil lewa, di samping itu pembacanya hendaklah berusaha memahami apa yang dibaca dan apa yang didengar.

2. تَنْتَبِلُ bererti menumpukan amal ibadat kepadaNya dengan sebulat-bulat tumpuan atau menghadap kepada Allah dengan memutuskan segala hubungan yang lain. وَأَذْكُرِ اسْمَ رَبِّكَ وَتَنْتَبِلْ إِلَيْهِ تَنْتَبِلًا (Ayat: 8), perkataan تَنْتَبِلُ juga adalah maf'ul mutlaq yang memberi erti kekuatan dan keseriusan dalam menghadap kepada Allah dan memutuskan hubungan dengan segala yang lain. Tujuannya ialah supaya manusia yang akan menjadi pemimpin Islam mempunyai hubungan yang begitu kuat dan teguh dengan Allah.

3. Setelah menerima Allah sebagai إِلَه، kita diperintah supaya menjadikanNya sebagai وکیل dan bertawakkal kepadaNya.

Tidak ada إِلَه yang lain selain Allah yang mengatur dan mengurus perjalanan langit dan bumi, kerana itu Dia hendaklah dijadikan sebagai وکیل (pelindung dan penjaga) (Ayat: 9):

رَبُّ الْمَشْرِقِ وَالْمَغْرِبِ لَا إِلَهَ إِلَّا هُوَ فَاتَّخِذْهُ وَكِيلًا ۝

9. Dia lah Tuhan yang menguasai timur dan barat; tiada Tuhan melainkan Dia; maka jadikanlah Dia Penjaga yang menyempurnakan urusanmu.

4. Perintah bersabar dan beristiqamah di samping beradab dalam menyampaikan da'wah.

Rasulullah dinasihati supaya bersabar dalam menghadapi orang-orang musyrikin yang begitu kuat menentang dan banyak membuat tuduhan kepada Baginda. Baginda diajar supaya mengabaikan penentangan dan tuduhan mereka dengan cara beradab dan sopan, itulah antara adab da'wah yang telah diberikan di peringkat permulaan Islam lagi (Ayat: 10).

وَأَصْبِرْ عَلَىٰ مَا يَقُولُونَ وَأَهْجُزْهُمْ هَزْرًا جَمِيلًا ۝

10. Dan bersabarlah terhadap apa yang dikatakan oleh mereka (yang menentangmu), dan jauhkanlah dirimu dari mereka dengan cara yang baik.